

Selasa, 8 Jun 2021, 11:01am

Jumlah rakyat Pahang daftar vaksin meningkat

Oleh [Asrol Awang](#) - Jun 7, 2021 @ 5:08pm
bhnews@bh.com.my



Gambar hiasan. Foto fail NSTP

KUANTAN: Jumlah rakyat Pahang mendaftar bagi mendapatkan suntikan vaksin COVID-19 terus meningkat, apabila 43.3 peratus atau 534,061 orang sudah berbuat demikian sehingga hari ini.

Menteri Besar, Datuk Seri Wan Rosdy Wan Ismail, berkata peratusan rakyat negeri itu mendaftar menerusi aplikasi MySejahtera meningkat, berbanding 39.6 peratus pada minggu lalu.

Beliau berkata, peningkatan jumlah pendaftaran membuktikan rakyat Pahang menyahut rayuan dan saranan kerajaan dan Kementerian Kesihatan (KKM) untuk mendaftarkan diri untuk mendapatkan suntikan itu.

"Terima kasih kepada rakyat Pahang atas kerjasama mengambil peluang untuk mendaftar bagi menerima suntikan vaksin.

"Kita bersyukur kerana ada peningkatan pada peratusan pendaftaran di negeri ini menerusi aplikasi MySejahtera iaitu 43.3 peratus berbanding 39.6 peratus pada tujuh hari lalu," katanya menerusi hantaran di Facebook, hari ini.

Bagaimanapun, Wan Rosdy berkata, peratusan itu masih perlu ditingkatkan lagi dari semasa ke semasa sehingga mencapai sasaran 80 peratus rakyat Pahang mendaftar seterusnya menerima suntikan vaksin masing-masing.

"Marilah kita bersama-sama menjayakan matlamat ini agar usaha kita dalam membendung seterusnya mengatasi ancaman penularan wabak pandemik COVID-19 berjaya," katanya.

Berdasarkan sasaran, kerajaan negeri menyasarkan 1.2 juta rakyat Pahang mendaftar untuk mendapatkan suntikan vaksin, demi memelihara kesihatan dan memutuskan rantaian COVID-19.